

24/10/1998

Cukai ikut tahun semasa

MULAI tahun 2000, orang ramai akan dikenakan cukai pendapatan mengikut tahun semasa, bukan lagi berasaskan tahun sebelumnya, seperti diamalkan sekarang.

Serentak pelaksanaan kiraan cukai mengikut tahun semasa itu, cukai pendapatan bagi 1999 tidak perlu dibayar bagi mengelak pembayaran dua kali dalam tahun taksiran 2000.

Perkara ini terkandung dalam Belanjawan 1999 yang dibentangkan Datuk Seri Dr Mahathir Mohamad di Dewan Rakyat, semalam.

Berikutan itu, Lembaga Hasil Dalam Negeri (LHDN) mulai 2001 secara berperingkat tidak lagi membuat taksiran cukai pendapatan bagi pihak orang ramai, sebaliknya pembayar cukai perlu membuatnya sendiri.

Seorang pegawai LHDN mengulas cadangan Belanjawan itu berkata, pembayaran cukai mengikut tahun semasa bermakna orang ramai hanya akan dikenakan cukai berdasarkan jumlah pendapatan yang diperolehi mereka bagi tahun itu.

Menurutnya, langkah itu diperkenalkan untuk meningkatkan keberkesanan dalam operasi LHDN, menjimatkan masa dan tenaga serta pada masa yang sama dapat mempercepatkan segala proses dokumentasi seperti pemfailan dan pengisian notis.

Mengenai taksiran diri sendiri pula, pegawai itu berkata, orang ramai akan memberi maklumat mengenai jumlah pendapatan mereka kepada LHDN dan seterusnya LHDN membuat pentaksiran cukai yang sepatutnya terhadap mereka.

Oleh itu, menjadi tanggungjawab pembayar cukai menyerahkan maklumat lengkap dan tepat kepada LHDN supaya pengiraan tepat dapat dibuat.

"Ketika ini, pembayar cukai diwajibkan menyerahkan pulangan cukai kepada LHDN untuk diperiksa tetapi disebabkan pentaksir tidak mempunyai maklumat penuh dan kesuntukan masa, kes lari cukai sering berlaku," katanya.

Mengenai mengapa cukai pendapatan pada 1999 tidak perlu dibayar, beliau menjelaskan ia untuk mengelak pembayaran dua kali pada 2000.

"Pada tahun itu apabila sistem pembayaran cukai tahun semasa mula dilaksana, orang ramai perlu membayar cukai untuk tahun 2000 sahaja dan bukan 1999 seperti di bawah sistem lama," katanya.

(END)